



Inatsisartuni ilaasortamut
Jens NapâtôK', Naleraq

27-01-2026
Sags nr. 2026 - 1468
Akt. id. 26169236

Postboks 970
3900 Nuuk
Tlf. (+299) 34 50 00
Fax (+299) 34 63 64
E-mail: isn@nanoq.gl
www.naalakkersuisut.gl

Utoqqaat illui pillugit – § 37 naapertorlugu apeqqummut nr. 008/2026-mut akissut

Asasara Jens NapâtôK'

Apeqquutinnut qujanaq. Inatsisartut Suleriaasianni § 37, imm. 1 naapertorlugu utoqqaat illui pillugit Naalakkersuisunut apeqquteqaateqarputit. Apeqqutit tullinnguuttut ataasiakkaarlugit saqqummersinneqarput, akissutinik tullegartiterlutik.

1. Nunatsinni utoqqaat utoqqaat illuaniittut qassiuppat?

Apeqqutit erseqqissumik akisinnaajumallugit utoqqaat tassaapput Utoqqalinersiaqarneq pillugu Inatsisartut inatsisaat nr. 20, 23. november 2015.-imeersoq naapertorlugu utoqqalinersiutisiaqalersimasut.

Kisitsisit Nunatta Naatsorsueqqissaartarfianeersut pissarsiarineqarsinnaasut kingulliit naapertorlugit Kalaallit Nunaanni utoqqaat 2024-imi 405-it utoqqaat illuini najugaqarput.

2. Kommunikkaartumik qassiuppat?

Kisitsisit tullinnguuttuni Statistikbanken-inimeersuni 2024-mi utoqqalinersiutisiallit killilimmik pisartagallit amerlassusaat takuneqarsinnaapput. Utoqqalinersiutisiallit utoqqaat illuini paaqqutarinnittarfinniluunniit allani najugaqartut nerisaqarnermut najugaqarnermullu akiliuteqartartut killilimmik pisartagaqartinneqartarput, utoqqalinersiaqarneq pillugu Inatsisartut inatsisaat naapertorlugu utoqqalinersiutisiassaasa ilanngaaffigisarnerisigut.

Kommuni	Utoqqalinersiutisiallit december 2024-mi killilimmik pisartagaqartut amerlassusaat
Kommune Kujalleq	81
Kommuneqarfik Sermersooq	83



Qeqqata Kommunia	77
Kommune Qeqertalik	70
Avannaata Kommunia	94

3. Utoqqaat utoqqalinersiaanik utoqqaat illuaniittut qanoq ilanngaanneqartarpat?

Innuttaasoq utoqqalinini pissutigalugu utoqqaat illuanut paaqqutarinnittarfimmullunniit allamut piffissami sivisuumi inissinneqarallarp, tassanilu najugaqarnera pisortanit akilersorneqarpat, Utoqqalinersiaqarneq pillugu Inatsisartut inatsisaani § 13, imm. 2 naapertorlugu utoqqalinersiutisiassaas ilanngarneqartarput.

Qaammami nuuffiusumi tulluittumilu utoqqalinersiutit allanngortinnagit tunniunneqasapput. Tamatuma kingorna utoqqalinersiutit toqqammaviusumik aningaasartaasa 46%-ii tunniunneqartassapput. Tassa imaappoq utoqqalinersiutit toqqammaviusumik aningaasartaat 54 %-imik ilanngaaffigineqartarput.

Utoqqalinersianut tapisisoqartarpat tapisiasat qaammammi nuuffiusumi tulluittumilu allanngussanngillat, tamatumali kingorna pisartagaajunnaassallutik..

4. Kommunikkaartumik utoqqalinersiat tamakkiisumik tunniunneqartalertuuppata qanoq pisortanut naleqassua?

Utoqqalinersiutisiaqarneq pillugu Inatsisartut inatsisaani kapitali 3 naapertorlugu utoqqalinersiutisiat aningaasartaat aalajangersarneqartarput. Utoqqalinersiutisiaqartup isertitassatut tunngavissai aalajangersimasumik aningaasartalerneqarsimatillugit utoqqalinersiutisiassat aningaasartai appartinneqarsinnaapput, taannalu appariartortitsinissamut maleruagassamik taaguuteqartinneqarpoq.

Utoqqalinersianik appariartitsinerup atorunnaarsinneqarneranut aningaasartuutaanerusussat pillugu nassuiaammi Isumaginninnermut, Suliffeqarnermut Nunamullu Namminermut Naalakkersuisoqarfiup 2025-mi saqqummersitaani tabel 4-mi¹, takuneqarsinnaasutut 2025-mi ukiumut aningaasartuutaanerusimasut kr. 79.000.000-iusimassasut, appariartortitsinissamik maleriagassaq piusimanngikkaluarpat. Appariartortitsinissamik maleruagassaq atorunnaarsinneqarpat aningaasartuutaanerusartut ukiuni aggersuni annertusiartornissaat naatsorsuutigineqarpoq, utoqqalinersiutisiaqartut amerlisussaammata. Nalunaarusiaq naapertorlugu appariartitsinissamik maleruagassap atorunnaarsinneratigut utoqqalinersiutisiat aningaasartaasa tamakkerlugit tunniunneqartalernerisigut pisortanut aningaasartuutaalersussat takussutissami tullinnguuttumi takuneqarsinnaapput.

¹ Utoqqalinersianik appariartitsinerup atorunnaarsinneqarneranut aningaasartuutaanerusussat pillugu nassuiaammi Isumaginninnermut, Suliffeqarnermut Nunamullu Namminermut Naalakkersuisoqarfiup 2025-mi saqqummersitaani qupperneq 17



	2025	2030	2040	2050
Ukiumut aningaasartuutaanerusartussat (mio. kr.)	79	100	118	101
Akilerarutinit akitsuutinillu aningaasat utertinneqartut (mio. kr.)	34	43	51	43
Akilerarutinit akitsuutinillu utertinneqartut kingorna ukikumut aningaasartuutit (mio. kr.)	45	57	67	57

Erseqqissaatigineqassaaq kisitsisit saqqummiunneqartut nalunaarusiami missingiisimanernit siumullu naatsorsuisimanernit kisimi aallaaveqarmata. Naatsorsukkat tunngavissanik allannguutinillu assigiinngitsunik tunngaveqarmata aningaasartuutaanerusussat naatsorsoqqissaarnerinut annertuumik sunniuteqarsinnaapput. Taamaattumik kisitsisit saqqummiunneqartut annertuumik nalorninartoqarput pisortallu aningaasartuutigisartagaat eqqarsaatigalugit eqqoqqissaartutut isigineqarsinnaanatik, appariartortitsisarnermik atorunnaarsitsisoqassappat aningaasartuutissat annertussusissaanut assersuutitut tunngavigineqarsinnaalluni.

Inussiarnersumik inuulluaqqusillunga

Aqqaluaq B. Egede